

2 Korin

Pas yimbu Por ai Korinihündambo sürü papimarandi

1 ¹Karihasihandüri, wandafi mami, ro Por-anahi sapo God ai wambo moani ahandi yifiri süngu Sisas Kraisindi hoafi semindi ho rambohünda kafaore hiniñgi-mareandiri. Ro asu sihefi wandafi Timotidibo Godindi nendi se Korin ngoafihü amarei-anei, asu muñguambo Akaia hifambe amarei rananei, siheimbo muñguambo pas nda sürü papiriho koararihehoandi. ²Sihefi Ape God asu Adükari Sisas Krai ai siheimbo moani hipoambo-ndineandürühi ngusüfoambe afurife kifeimbi hohoanimo mbisabinandür-amboane.

Godimbo Por ai hihifimarüri

³Awi sihiri Adükari Sisas Kraisindi God asu Ape ranahambo aboedani mbisefimboane. Ai hipoambo-reandeimbi Ape-ani asu ngusüfoambe afurife kifeimbi hohoanimo muñgu ra sai-randeimbi God-ani. ⁴Aiani yihoefimbo-so nine tiñirifo afindi tüküfeyoani ngusüfoambe afure küreamuni arandi. Rananimbo asu ro mandiho nindou bidifiri aheimbo sowahi tiñirifo tükefeyondüri ranaheimbo hohoanimondehühi ngusüfoambe afurindiho kündihoa-ndürimboyehi sapo ro yihoehihoari Godindi-mayo ngusüfoambe afurife kife hohoanimo sahoaminde hohoambo nahurai wambo. ⁵Kraisimbo sowahi tiñirifo afindi tüküfeyoani semündü marandi asu ranane ro-amboani sahoaminde arihoandi. Rahurai-ane Kraisindi ngusüfoambe afurife kifimbi hohoanimo afindi ranai yihoehimbo-so tüküfeyomuna sahoamünde arihoandi. ⁶Asu yihoehimbo-so tiñirifo afindi tükündifeyoani ro siheimbo hohoanimondemboyehi sihei ngusüfoambe afurife kifemboane, asu rananimbo God ai siheimbo aboedambo-ndeandürümbui. Ñga asu

God ai yihoehi ngusüfoambe afurifembü hohoanimo kürareamuni ana, asu sihei ngusüfoambe afurifendürimbo kameihane. Raninambo ro tiñirifo masahoamindehi nahurai se moanane sei hehi nginindi animboei hei ana, God ai sihei ngusüfoambe hohoanimo afure küre arandi. ⁷Ro siheimboya se nginindi mbiniboadeia sehohoa anihondümbo-rihorühanehi. Ranimbo-hündambo ro rariho fifirihoamboanehi, se ro-babidi tiñirifo sahümündiani asu se-amboani ngusüfoambe afurife kifimbi hohoanimo ra ro asahoamindehi nou ndahümündimboyei.

⁸Tiñirifombü moatükuni Esia hifambe wambo tükümeferi ranahamboanahi ro wandafi mami siheimbo hoafindahandüra se ranahambo fifirimbirihinda saheeamboanahi. Ranühi wambo tiñirifo afindi hamindi tüküfendirühiyo asu wandi nginindi niñgombo ratüpuri hohoanimo ra muñguna hifinamareandiri. Raniyahi asu ro ngiri yangiri aboedi nimboahi sahehea hoanimomayahi. ⁹Raniyahi asu ro hohoanimoyahani wandi fiambe tiñirifo afindi tükümeferowa yifindamboyafi masahi sapo nindou kot hifandi-randeimbi ai hoafiyuhüya, se yifindamboyafi, ehü nahuraiyo tükümeferondiri. Ñga asu rani-moatükuni yihoefimbo tükümefero ra yihoefi fimbo hohoanimokoate-ndehühi, ro God yifihündi botire-randeimbi-mayu ranahambo yangiri-animbo hohoanimo-ndefomboane. ¹⁰⁻¹¹Rani-moatükuni moaruwai ranai yihoefimbo hifokoeffemünimbo mayoyosi, nga asu God ai yihoefimbo ranambeahindi aboedambo-mareamuni. Mande ai-animbo süngunambo aboedambo-ndeamunimbui. Asu se yihoefimbo farihehimunühi Godimbo didibafayahündo ana, ro ahambo nginindi anihondümbo-rihurühi sefiya, “Ai yihoefimbo aboedambo-ndeamuni ngu,” asefi. Ranimambo hohoanimo-yahümünühi amboani asu Godimbo hihifi-mbirihor-amboane ai yihoefimbo afarihemuni ranimbohünda. Ai nindou afindiyei didibafife süngu yihoefimbo hipoamboreamunühi mafarihemuni.

Por ai hohoanimo ngörü-süngumareandi

¹²Ndani-moatükuni ndanahamboanahi ro hihifi-hihifiya arihandi: Wandi hohoanimoambe yare hoafimeyondiri ro Godindi-mayo sürühoembi hohoanimo hohoanimoya marihandi. Hifi ndanihündambo nindou-yafe fifirifenambo wambo moai rani hohoanimo ranai rareandira tüküfeyondiri, nga wani. Ñga Godindi hipoambofe hohoanimo ranai wambo ramareandira asu ro nindou-yei mbusümo mbumundi hohoanimo rani-süngu yangiri mahahabodihü. Siheimbo-poanimbo ro yahurai ramariheandiri hahi. ¹³⁻¹⁴Ro siheimbo pas sürü papiriho arihoandi ra se hoeindihü mbundihü hoafi ra fifirindihimboyei. Hapoana hoafi ra se akidou yangiri fifirihindi. Ñga se ro hoafayehi nda muñguambo fifirindihindihü hohoanimomboye-amboane sehehoamboanehi.

Ranimbo Adükari ai kosimbo si ra tüküfeyoambe-animbo ro siheimbo hihifi-hihifinda-hoandürimboyehi mare yahurai-animbo se yihoehimbo hihifi-hihifinda-hümunimboyehi.

¹⁵⁻¹⁶Ro rarihe hohoanimoyahiya, ai wandi hohoanimo wudipoapondihi fifirindihindi sahehea horombo ro siheimbo sowana sifomboanahi masahi. Ro Masedonia hifinambo hafohü kosohü siheimbo hoeifendürimbo asahi, asu se wambo Sudia hifinambo hombo mbifari-hehindiramboane saheeamboyahi hohoanimomayahi. Rananimbo se wambo yimbumbo hoeindihindirühi hihifi-hihifimbeyei-amboane masahi. ¹⁷Horombo ro siheimbo yimbumbo hoeifendüri horombo hoafirihe masiheheandiyosi, nga wani. Nga ro wandi hohoanimo ngörü-süngumariheandi. Ro yimbu hohoanimo-yaheimbi-mbayahiyo? Ro hifi ndanihündambo nindou nou moai mami simboani wandi horombo hoafirihe masiheheandi ranahambo yini sa asu wani sa rihandi, nga wani.

¹⁸Sihiri Godimbo anihondümbo-arihuri nou asu se wandi hoafi amboa anihondümbo-ndihimboyehi. Muṅguambo hoafi ro siheimbo asahandüri ra yini ranane asu wani ranane ra ai wani. ¹⁹Ro Sairas, Timoti-babidi siheimbo Godindi Nimori Sisas Kraiss ranahambo hoafimehundüri, aiana yini yahu, wani yahu-randeimbiyupoani. Nga mami hohoanimo yanggiri-ani hohoanimoyu arandi. ²⁰Nga asu Godindi horombo hoafi afindi ra yanggoromboane, nga ranane asu Sisas Kraissindi süngu-ane horombo hoafi muṅgu ra anihondümbo tüküfe arandi. Ranane asu sihiri Godindi hoafi himboriyefühi asu Sisas Kraissindi süngu hoafiyefühi, “Anihond-ane,” asefi God ai adükar-ani hoafimbohünda. ²¹God aiani yihoefimbo se-babidimbo ṅginindi kikihiramündümuna asu sihiri Kraiss-babidi ṅginindi animboefi. Asu ai sihefimbo ahandi ratüpurimbo amboani kafaore hiniṅgimareamun-ane. ²²Aiyu ai ahandihoari sihefimbo diboniyumuni hiniṅgimareandi. Yifiafi Aboedi ranana sapo God ai sihefimbo aboedambo-femunimboayo ranahambo nafuimbo-hündamboane.

Por ai moai aheimbo sowana asükai hu

²³Nga ro anihondümbo hoafi hoafayahi nda God ai anihond-ane mbüsü ṅginindamündümbui. Nga ro siheimbo didi tiṅgiri fo afindi segudüripoani saheeamboyahi asu ro hombo hoafimayahi sihei ngoafi Korininambo asükai sinikoate-mayahi. ²⁴Sihei anihondümbofe ranana ro hifandi-handürühiyahipoani, nga wani. Sihei anihondümbofe hohoanimo ranamboane se-amboani siheihuari ṅginindi kikihirihümündi animboei. Rananehi asu ro sihei hihifi-hihifi hohoanimo ra botifembohünda se-babidimbo ratüpuriye arihoandi.

2 ¹Ranimboyahi ro moani wandi hohoanimonambo yanggiriya, awi ro ṅgiri aheimbo sowana gadi asükainda ṅginindifimbi hoafindahandürani,

afindi hohoanimondei sahehea hohoanimomayahi. ² Asu ro sühühühi siheimbo ngusüfoambe afindi kifimbi hohoanimo mbasahandüri-mbonana, asu nindou mami ai ngiri wambo hihifi-hihifimbohünda farihendiri. Iga se yangir-anei wambo hihifi-hihifi moatükuni randihinda hihifi-hihifayahi. ³ Seana wambo hihifi-hihifiyahündiri-rühündeimbi nindou-anei. Ranimboanahi asu ro siheimbo sowana sini siheimbo ngusüfoambe afindi kifimbi hohoanimo ra segodürimbo moei asahi. Ranimbo-hündamboayahi ro horombo siheimbo pas sürü papirihikoamaritheandi. Ro nini-moatükunimboyo hihifi-hihifayahi ana, asu se-amboani ro-babidi ranahambo hihifi-hihifiyeihanei. Rani moatükunimbo siheimbo muṅguambo anihondumbo-riheandürimboanahi. ⁴ Horombo siheimbo pas sürü papirihikoariheandi simboani ana wandi ngusüfoambe tiṅjirifo afindi nimariwohüyo asu asübusümbi hohoanimo ranai tüküfihüyo ro aranimo-aranimboya wakimariheandi. Se tiṅjirifombü hohoanimo-mbeyeia sahehea pas ra sürü papirihambo-yahipoani. Iga se wambo ro siheimbo hohoanimo afindi hohoanimo-arihandüri ra fifirimbirihinda saheeamboayahi parihe koamaritheandi.

Nindou ai siheimbo moaruwaimbo-mareandüri ranahambo amboawi mbisei-amboane

⁵ Nindou ai ngusüfoambe afindi kifimbi hohoanimo wambo yangiriyopoani masendiri, nga siheimbo muṅguamboyo masagadüri. Ro rani moatükunimbo afindi hoafimbo moeisahi, nga ranimboanahi moani bidifiri yangiri hoafayahi. ⁶ Nindou ranahambo nindou afindi se tiṅjirifombü ratüpuri masahündo ra awi rühü safi ahambo hiniṅgindihori. ⁷ Iga awi se ahandi hohoanimo moaruwai ranahambo amboawi sahündowohü asu ngusüfoambe afurife kifimbi hohoanimo ndahündo. Iga asu ngusüfoambe afindi hamindi kifimbi hohoanimo ai ahambo muṅguna moaruwaimbo-nderimboe. ⁸ Ranimboane ro siheimbo hoafi nda hoafehandüri, se ahambo sihei-mayo hipoambofe ra nafuindahündoan-animbo ai fifiri-mbireandamboane. ⁹ Ro horombo pas sürü papirihikoamari-heheandüri moani siheimbo refe hoeife-ndürimbohünda. Wandi-mayo hoafi se süngurihündühi muṅgu moatükuni ra rarihi mbarihündüyo wanimbaiyo? Iga se ahambo tiṅjirifo masahündo. ¹⁰ Asu se nindou düdi ai siheimbo moaruwai hohoanimoayundüri ranahambo amboawi ase ana, asu ro-amboani ahambo amboawi mbisahandomboayahi. Moaruwai hohoanimo engoro ana, ranahambo ro amboawi asahi ana, Kraisindi himboahü siheimbo fehete-ndürimbohünda amboawi sahühanahi. ¹¹ Satan ai sihefimbo tikai hoafindimuni-mbui sahehea ramariheandi ra. Ahandi dibohindi hohoanimo ra sapo sihiri fifirihumboanefi.

Troas ngoafihü Por ai tiṅjirifo afindi masemündo

¹² Ro siheimbo hiniṅgiriheiri hehea Troas ngoafihü Godindi hoafi hoafomböhünda tüküyaheandühi hoeiriheandane asu Adükari ai wambo

ranihü ratüpurimbohünda aboedi hohoanimo nafuimayundiri. ¹³Ŋga ro sihefi wandafi Taitus ranihü hoefikoate-yahühi asu ŋgusüfo afindi küriheandühi afindi hohoanimomayahi. Raniyahi asu ro nindou ranihü amarei aheimbo hihifiriharü hiniŋgirihearü hehea, asu ro Masedonia hifinambo mahahi, ŋga siheimbo sowana moai asüakai sühühi.

Kraisindi ŋginandinambo ro ŋgasündi-hurimboanefi

¹⁴Ŋga Godimbo hihifindi-hurimboane nimboe sapo aiani Krais-babidi nimboefani muŋguambo si aho ra sihefimbo aboedi nafi semündümuni huhü asu nine-moatükuni ranai sihefimbo moaruwaimbo-femunimbo aho ra ŋgasündihu aboedühi tükehundi. Yihoefi ratüपुरi ranahamboani God ai hoafiyuani asu nindou ai Krais ranahambo fifirarihori. Kraisimbo fifirife ranana aparümbi fisiŋarü yanggori wakareandi nahurai-ane. ¹⁵Sihiri amboani aparümbi fisiŋarü Kraisindi-mayo Godindi aboedi sesi mandife fondi waminindi aboedi tüküfe hafo arandi tüküfe haya God sowana aho nahurai-ane. Fisiŋarü ranane nindou Godindi hoafi süngurihindeimb-ayei asu ahandi hoafi süngufekoate-ayei ahei mbusümo yanggorü wakareandi. ¹⁶Nindou didiyei Godindi hoafi himborikoate animboei aheimbo ana yiŋi fisiŋiri nahurai-ane. Sapo fisiŋarü ranai-ane aheimbo hifokoarearü arandi. Ŋga asu nindou Godindi hoafi süngurihindeimbi aheimbo ana fisiŋarü ranai yanggiri niŋgombo sagadüri arandi. Nindou muŋguambo aiana ŋgiri aheihoari Godindi ratüपुरi ra randihindi. ¹⁷Ŋga se fifirihimboanei, roana nindou afindi ai homo Godindi hoafi hoafiyomondühi kaki sowandümo arandi nahurai nindou-yefipoani. Ŋga God ai yihoefimbo ratüपुरi ra masemuna asu ro moai ahandi ratüपुरi ranahambo tikai hoafiyefi rihundi. Ŋga roana Krais-babidi hohoanimo mami sünguri-hundühanefi asu Godindi himboarühi hoafi ra mbumundi süngu yanggiri hoafiyefi arihu hefi.

Simbori hoafi femindi sihefembo ratüपुरiyomo-rundeimbi nindou

3 ¹Ro Godindi ratüपुरiyefi-rihundeimb-aneŋi masefi ra awi asüakai yihoefihoari yihoefi fimbo boriyefihumbo se yihoefimbo aboed-anemo mbiseiya sefimbo mbaiyefiyo? Asu awi ro nindou bidifiri nou ai pas sürü papirihü-ndeimbihündi siheimbo saiyoani asu se yihoefimbo aboed-anemo yahombohünda mbayefiyo? Asu se yihoefimbo farihefemunimbohünda pas yahurai sürü papimboyo? Ŋga wani. ²Seanei yihoehimbo nindou muŋgu aboed-anafani yahomunimbohünda pas nahurai-ayei. Pas ranahambo sürü papimarihündi ranana sihei ŋgusüfoambe-ane amaro. Muŋguambo nindou ranai pas ranahambo fifirihü hehi asu ai hoeiferambo-hündamboane. ³Rani-moatükuni ra dibohindiyopoani, ŋga ai yahurai-ane. Krais ahandihoari randi pas ra sürü papira mbura yihoefi süngu koamarihendi. Pas ra moai

peninambo sürü papirandi, nga God yangiri koadürümbo nüngru-randeimbi ranahandi Yifiafinambo sürü papimarandi. Asu moai God horombo ramareandi nou nimoeifihî sürü papirandi, nga nindou-yei hohoanimoambeahiyo sürü papimarandi.

⁴Ro rani hoafi hoafayehi ra sapo Kraisindi süngu ro Godimbo anihondümbo-marihori. ⁵Asu ngiri yihoefihoari yangiri ana rani ratüpuri ra randihundi, nga ranimboane asu ro ngiri hoafindefühüya, yihoefihoari rihundi rani ratüpuri ra ramarihundi mbisefi. Nga Godindi nginindi sahumindefi hohumboane fi ratüpuriyefi arihundi. ⁶God ai ahandihoari yihoefimbo se randumboemo mehuwa, asu ro simbori hoafi femindi sihefe ratüpuri rani nindoumboyahu animboefi. Ratüpuri ranana horombo sürü papiru sihoemombo-yomopoani. Nga Yifiafi Aboedindi nginindinamboyo sürü papira masihendi. Ahinümbi hohoanimo sürü papiru masihoemo rani-süngu ana nindou ai yifiyei arihüdi, nga Yifiafi Aboedi ana nindumbo gedühi yangiri niŋgombo sendühane.

⁷God ai ahinümbi hohoanimo ra nimoeifihî sürü papimarandi. Nga asu raniyo rani-moatükuni ra Godindi-mayo himboamupuimbo-randeimbi rani bitapire tükümfeyo. Raniyo asu Mosesindi ngusümboari ranai himboamupuimbo-maranda asu Israerihüdi ai ahandi ngusümbori ra ngiri ndondihi hoeindihindi. Nga asu sünguna homboyo rani-moatükuni ranai afurimarihoayo. ⁸Ranimboane Yifiafi Aboedindi ratüpuri ra ahinümbi hohoanimo ranahambo ngasünde haya himboamupui-randeimb-ane. ⁹Ahinümbi hohoanimondi ratüpuri ranana nindumbo papi-hoafimboane, nga asu Godindi-mayo himboamupuimbo-randeimbi si rani-dibo meŋgoro. Rani hohoanimo rani-sünguyo nindou ai yifiyei arihüdi. Nga asu nindumbo Godindi himboahü mbumundi tüküfembo ratüpuri himboamupuimbo-randeimbi si rani-dibo eŋgoro ra ngasündeamboane. ¹⁰Anihond-ane, horombodidi ratüpuri ranahandi himboamupui-randeimbi si adükari mayosi, nga ndeara dikirifemboane. Nimboe sapo hapoana aboedi hoafindi ratüpurindi himboamupuimbo-randeimbi si adükari hamind-ane. ¹¹Ahinümbi hohoanimondi ratüpuri himboamupuimbo-randeimbi si kameihî tükümfeyosi, nga moai gedühi yangoro. Nga aboedi hoafindi ratüpuri koadürümbo-koadürümbo yagodomboe ranimboane asu ahandi himboamupuimbo-randeimbi si ra adükari hamindi-mbeyowamboane.

¹²Aboedi hoafindi ratüpuri ranana ngiri müngundo ranahambo ro anihondümbo-rihu hohu animboefi. Ranimboane asu ro yihimbokoate ranahambo hoafiyefi arihundi. ¹³Roana Moses yare marandi nou moai yarihu rihundi. Aiyu ahandi ngusümboari ra hoearinambo gabudimareandi. Rananimbo Israerihüdi ai sapo himboamupuimbo-randeimbi si ra ahandi ngusümboarambe tükümfeyo ra ngiri hoeindihinda afurinde gado. ¹⁴Nga asu ahei hohoanimo ra moai

hoeireandüri. Raniyei asu ai horombodidi hoafi femindi sihefe ra hoeirihindühi asu ahei ngusümboarambe hoeari nou ranai ahei ngusüfoambe gabudifoareandüri haya ho-hombo haponda tükefeyo. Ai moai rani-moatükuni ra raguanambo-rihindi, nga wani. Krais mami ranahandi süngunambo yangir-animbo God ai hoeari ngusüfoambe gabudareandi ra raguanambo-ndeambui. ¹⁵Horombo peyo haya ho-hombo hapondan-amboani ai Mosesindi hoafi hoeirühi marühi hei ra hoeari ranai ahei hohoanimo ranahambo gabudimareandüra asu hoafi nimindi ra moai fifirihindi. ¹⁶Ŋga nindou ai Adükari sowanambo hihiriyahi ahei ana, hoeari ra Adükari ai raguanambo-ndeambui. ¹⁷Adükari ndanai ana Yifiaf-ani. Ŋga asu Adükarindi Yifiafi ranai nindou ranahandi fiambe amarondo ana, asu nindou ranai moani aboedambo-ndüfimbui. ¹⁸Muŋguambo sihiri ana moai sihefimbo nini-moatükuni ai ngusümboari gabudeamuni. Ranane asu Adükarindi-mayo himboamupuimbo-randeimbi si ranai sihefimbo tapara-mindimunühi asu sihiri hoehimbo nou nindou ranahei fihi hefi taparihu-mindefimbo nou-ayefi. Rananeŋi muŋguambo si aho ra himboamupuimbo-randeimbi si ranai adükari tüküfe howohü sihefimbo ŋgorü-süngureamuni hoani sihiri Adükari anüŋgu nou nimboefi arihundi. Adükari sihefi ranai Yifiafi wamboani ai rasüngure arandi.

**Kraisindi hoafi sowandümo homo-rundeimbi ai
hifina nafümbi hipiri nahurai-anemo**

4 ¹Sapo God ai yihoefimbo hipoambo-reamuni hayambo-wamboyu ratüpuri ra masemuni ro refembohünda, ranimboane asu ro moai yihoaruko-yihoaruko-yahundühi ambe sefi hiningirihundi, nga wani. ²Ranimbo-hündamboyefi asu ro amoaniŋgümbi ratüpuri dibo eŋgoro nindou ai yaru marundi ra daboadanambo-marihundi. Roana moai tikai hoafi hohoanimo süngurihu hefi rihundi asu moai Godindi hoafi ra ŋgorü-süngurihu rihundi, nga wani. Ŋga roana nindou ranai yihoefi ratüpuri Godindi himboahü ra hoeirihindühi ahei hohoanimoambe ratüpuri ranahambo aboed-ane mbiseiya sefimboaneŋi asu hoafi hondü ra weindahi hefi hoafiyefi arihundi. ³Godindi hoafi ro hoafiyefi arihundi ranai dibo eŋgoro ana, sapo nindou ahandi hoafi himborikoateyei heimbo awarihefemboaye aheimbo-anendüri. ⁴Nindou ranai ana hoafi ranahambo moai anihondumbo-rihindi, sapo ahei hohoanimoambe nimbi amaro hifi ndanihündambo tikai god nüŋgumbü Satan ai gabudi-foareandüri hayambo wambo. Rananei asu ai Krais sapo Godindi sisami hondü nahurai aiyu ranahandi aboedi hoafindi himboamupuimbo-randeimbi si ra moai hoeirihori rihundi. ⁵Ro bokararihehandi ra moai yihoefi fimbo hoafiyefi rihundi, nga wani. Ŋga Krais ai Adükar-ani sefi hoahumboaneŋi asu ro ahandi sünguyo

sihefi ratüpuriyefi rihundeimbi animboefi ranahambo hoafiyefi arihundi. ⁶Sapo God hifi sünü nafirandambe ai hoafiyuhü yahuya, “Nimbi yare nimaroambe si ranai simbeyo-wamboane,” mehu. Asu God mami ranani sihefi hohoanimoambe si ramareanda afindi hamindi tüküme Feyo asu sihefi ngusüfoambe ranai aboedi si nahurai engoro. Ro si ranahambo fifirihumboanefi sapo Godindi himboamupuimbo-randeimbi si Sisas Kraisindi ngusümboarambe apeniŋgo ranahambo.

⁷Ŋga roana sapo aboedi hoafi nginindi napo nahurai hifina nafümbi hipirambe afoero nahurai-ane fi. Rani-moatükuni ra nindou ai yarihi fifirihindühi ndani-moatükuni nginindi afindi nda Godindi-mayoane, ŋga asu yihoefi-mayopoani mbisei-yambohündamboane ra. ⁸Yihoefimbo afindi tiŋirifo ranai moaruwaimbo-reamunisi, ŋga asu awi moai muŋgunambo moaruwaimbo-reamuni. Afindi moatükuni ranai yihoefi hohoanimo ranahambo kikihiramindi-munühanesi, ŋga asu awi yihoefi hohoanimo ra moai muŋgunambo hamindi peyo randi. ⁹Nindou bidifiri ai yihoefimbo moaruwaimbo-rihimuni marihündisi, ŋga asu God ai yihoefimbo moai hiniŋgireamuni randi. Ai yihoefimbo hariyahümuni marihündisi, ŋga asu ro moai moaruwaimbo-yahu rihundi. ¹⁰Muŋgunambo si maho ra Sisas yifimayu nou yihoefi fimbo amboani yifimbo yanggiri nahurai-mayefi. Ranimboane asu Kraisindi yanggiri niŋgo hohoanimo ra yihoefi fiambe hoeimbirihind-amboane. ¹¹Ro yanggiri nimboefühi Sisasindi ratüpuri, ratüpuriyefani, nindou ai yihoefimbo hifokofemunimbo sei hehi raraomarihümuni. Ranimbo asu Sisas ai hifi ndanihü manüŋgu ahandi yanggiri niŋgo hohoanimo amboani yihoefi yifimbo fiambe weindahi tükümbifeyo-wamboane. ¹²Ranane asu yifimbo hohoanimo ra yihoefimbo sowahi engoro, ŋga yanggiri niŋgo hohoanimo siheimbo sowahi engoro.

¹³Godindi hoafi yahoya, “Ro anihondümbo-rihe heheambo wamboanahi hoafayahi,” meho. Mare yahurai-ane ro-amboani mami anihondümbofe-namboanefi hoafayefi. ¹⁴God ai Sisasimbo yifihündi botimariri ranahambo fifirihumboanefi. Ranimbo-hündambo-animbo asu yihoefimbo amboani Sisas ramefiyu nou botindeamuni haya, ndemündümuni siheimbo kameihi gafu ahandi fikimi hiniŋgindeamunimbui. ¹⁵Ŋga asu siheimbo farihefe-ndürimboane muŋgu tiŋirifombü rani-moatükuni yihoefimbo sowahi tüküfe arandi. Süngunamboanimbo Godindi hipoambo hohoanimo ranai nindou afindi ahei ngusüfoambe tükündifendüri ndandani asu ai Godimbo afindi hihifindihorühi ahambo aboed-ani sei mbirihünd-amboane.

¹⁶Roana ranimbo hohoanimoyefi hoeirihündühanefi asu ro Godindi ratüpurimbo ra moai mbosiyefi rihundi. Yihoefi fi ranai moaruwai-yowohanesi, ŋga asu yihoefi ngusüfoambe hohoanimo ranai muŋgunambo si aho ra aboedi simbori tüküfeyoani ndorihu hohoanimoyefühanefi.

¹⁷Rani-moatükuni ra ai ndahurai-ane: Tiñirifo yihoefimbo sowahi tüküfe arandi ra afindi hamindiyo poani, nga ranimbo wambo asu ngiri amitata moendindo. I nga asu süngunamboanimbo sünambe moani aboedi hamindi ngörü-süngundahu koadürümbo-koadürümbo nimandembo yefi. Sünambe süngunambo aboedi hamindi nimari ranai-animbo asu haponda hifi ndanihü tiñirifo akidou engoro ranahambo ngasündeamboe.

¹⁸Sihiri ana moai nine-moatükuni himboarinambo hoeife-randeimbi moatükuni ranahamboyo poani kokorihu hefi arihundi, nga wani. I nga sihiri ana nine-moatükuni himboarinambo hoeifekoate-yefi arihundi ranahamboane hohoanimo parihi arihundi. Sapo nine-moatükuni sihefi himboarinambo hoeirihu arihundi ranana ngiri gedühi yagodo, nga nine-moatükuni sihiri sihefi himboarinambo hoeifekoate-yefi arihundi ranai-animbo gedühi koadürümbo-koadürümbo yagodimboe.

5 ¹Sihiri fifirihumboanefi hifi ndanihü dago ndanambe animboefi ndanana kandihoyoani asu ngoasumboani ana God ai wori hondü sünambe sihiri niñgomböhünda hiniñgimareandi ranambe-animbo nimboembo yefi. Wori ranana nindou moai worimboarundi, nga moani koadürümbo fondarimboane. ²Hapondanana sihiri wori aboedi hamindi sihefimbo sünambeahindi nou gabudi-foareamunimbo afondaro ranahamboanefi sihiri hañafumbo yefühi hohoanimo pararihundi. ³Sihiri rani-moatükuni aboedi ra fi ranahambo gabudafoarihundi ana, asu sihiri ngiri fi safi yangiri nimboefi. ⁴Yini, awi sihiri haponda dago ndanambe nimboefomboanefi hañafumbo yefühi afindi hohoanimoayefi. Asu sihiri rawehundi ra sihefi fi-hoeari wamindafi ra raguanambo-fembo sefi hohumbo yefipoani, nga wani. I nga sihefi fi-hoeari simbori ra sapo hoeari hondü simbori nahurai güdifemboane. Asu rananimbo sihefi fi sümboyo-randeimbi ranai aboedi yangiri gedühi niñgombo ra mbisemindowambo sefi hohumboanefi. ⁵God ai ahandihoariyu sapo sihiri yangiri semindi hefe niñgombo ra didiboadore masihendi. Raniyu asu ai sihefimbo Yifiafi Aboedi ra masemuni. Yifiafi Aboedi masemuni ranana sapo muñgua aboedi moatükuni süngunambo God ai sihefimbo refemunimboayu ranahandambo weañgurühididi bidifiriyo.

⁶Ranane sihefi fiambe nginindi tüküfemuni arandi. Haponda sihiri ra randihu fifirindi-humboane sihefi fi nda sihefi wori nahurai ranambe animboefisi, nga sihiri Adükarindi wori ranahambo angun-anefi animboefi. ⁷Hapondanambe sihiri moani Adükarimbo anihondümbo-rihurühanefi animboefi. I nga nini-moatükuniyo hoeifembo ranahambo hohoanimo parihi-ndühiyefipoani animboefi. ⁸Sihefi hohoanimo ranai nginindi tüküfemunühane asu roana yihoefi fi nda hifi ndanihü hiñgife hefembo hafo Adükari-babidi ngoafi hondühi nimarimbo rananefi hohoanimoayefi. ⁹Ranimboanefi sihiri ana ngoafi hondühi nimboefühi-ndoan-ane asu ndühi nimboefühi-ndoan-ane ra ro moani nine hohoanimo

Adükari ai hohoanimoayu ra süngufembo yangiri hohoanimoayefi. ¹⁰Muŋguambo sihiri Adükari ai yiboboreandi simboani ra ahandi himboahü tükündahumboyefi. Ranimbo rani-simboani sihiri fi ndarihu nimboefambe aboedi ratüpuri ratüpurimayef-ane, asu moaruwai ratüpurimayef-ane, ranimbo muŋguambo sihiri mamami nine-moatükuni ramarihundi simoŋgorühi Adükari ai ndemunümbui.

Nindou ai Kraisindi süngu Godindi ŋgunindimbofe tüküfemboane

¹¹Ranimboane roana Adükarimbo yihimboyefühi, ahandi hoarehi nimboefühi nindou bidifirambo hoafiyefi habodefi arihundi ahei hohoanimo botifendürani ai Adükarimbo anihondümbo-fimbohünda. God ai yihoefimbo ndore fifireamunimboani. Mare yahurai-ane sihei hohoanimoambe se yihoefimbo ndorihififirimbirihimunamboane asefi. ¹²Ro asükai siheimbo ndani hoafi hoafayefi nda se yihoefimbo aboed-anemo yahombo-hündamboyoani, ŋga se yihoefimbo hihifi-hihifi-mbeyahümuna sefimboyefi. Ranimbo asu se nindou bidifiri-yafe hohoanimo ranahambo hihifi-hihifayei, ŋga nindou-yafe hohoanimo ranahambo moai hohoanimoyei se simbori hoafimbohünda hoafayahandüri. ¹³Nindou bidifiri ai yihoefimbo hihindi-hihindi-yomondühanemo masei. Ro hihindi-hihindayefi ana, Godimbo-hündamboane. Ŋga asu haponda ro ndorihu hohoanimoayefi ana, ra siheimbo farihefendürimbo-hündamboane. ¹⁴Krais yihoefimbo hipoambo-mareamuni hohoanimo ra yihoefi ratüpuri ranahambo hifandarandi. Ra yarihu fifirihundi nindou mami ai nindou muŋguambo ranaheimbo sünguna yifimayu rani-süngunambo-animbo nindou mamami sihiri amboani yifiyefimbo nahurai-ane. ¹⁵Ai nindou muŋguambo sihefi sünguna yifimayu. Rani süngumbo-animbo nindou sihiri ndarihu yangiri nimboefambe ra sihiri hohoanimomayefi süngu yangiri hohoanimoyohü hoahoŋgopoani, ŋga yowani. Ŋga sapo ai sihefi sünguna yifiyu mbura asükaiyu botifi mahafu ranimbo sihiri ndondihu hohoanimondefüh-animbo hahabodefomboane.

¹⁶Rani-mayowamboane roana ŋgiri nindou-yafe hohoanimo ra süngundihundühi asu nindou ŋgorüdi hohoanimo türüboadihu ŋgefi. Yini, horomboyefi sihiri nindou-yafe hohoanimo ra yarihu hohoanimoyefühi Kraisimbo tümafoarihuri hefisi. Ŋga asu hapondani ana sihiri moai ahambo rani hohoanimoyahundo rihundi. ¹⁷Himboriyei. Nindou mami ai Krais-dibo anüŋgu ana, God ai nindou ranahambo simbori nindoumbondiri hiniŋgindirümbui. Wamindafi hohoanimo awarimarihoayo, ŋga asu simbori hohoanimo tüküfemboane.

¹⁸Ran-moatükuni ranana God aiani nimindühiyu haya yare arandi. Horombo ana sihiri ahandi hürütümbü nindoumboyahü manimboefiyosi, ŋga asu hapondaniyu Kraisindi süngu sihefimbo God ai aboedi-

aboedi-mareamuni. Raniyu asu Godindi hürütümbü ranaheimbo farihefendürani asu ai God-babidimbo wudi-wudifembo ratüpuri ra yihoefimbo masemuni. ¹⁹Siheimbo ro ndarihu hoafehündüri: God ai nindou muṅguambo Kraisindi sünguyu ṅgunindimbore arandi. Asu ai moai nini-moatükuniyo moaruwai hohoanimoyei marihündi ranahambo hohoanimoyu sihairandi, ṅga wani. Asu ai nindoumbo wudi-wudifembo hoafi ra hoafimbo ratüpuri masemuni. ²⁰Ranimboanefi ro Kraisindi yasimondühindi hoafi ra sahumindefi hohu hoafayefi. God ai ahandihoariyu yihoefi yasimondi süngure haya muṅguambo nindou ranaheimbo wudi-wudindahindi yahundüri arandi. Rananefi ro Kraisindi fondi sahumindefi hohu hoafiyahu-ndürühiya, “Awi se God-babidi hürütümbü hohoanimo ra hiniṅgirihi hehi asu wudi-wudiyahi,” sefi hohu hoafiyefi arihundi. ²¹Krais ai moai moaruwai hohoanimoyu randi. ṅga asu God aiyu sihefi-mayo moaruwai hohoanimo ra ahandi wami semündü manandeandi. Raniyu asu Sisas ai nindou moaruwai hohoanimoyumbü nou tüküme fiyu. Sihefimboya, ai wambo-so nimboeimbo wandi ṅginindinambo Godindi nindoumboyahi moani aboedi mbumundi safi mbinimboei-amboane yahuhayamboyu ai rani-moatükuni ra ramareandi.

6 ¹Ro God-babidi ṅginindi nimboefombo ratüpuriyefi rihundeimbi-ane fi nda siheimbo hüti-hoafehündüri, “Sapo se Godindi-mayo hipoambo hohoanimo masahümündi-ane, ṅga asu se rani-moatükuni ra moani-yeimbündühümboyei,” asefi. ²God ai yare hoafiyuhü yahuya, “Rani si hamindi hondü ro sihei hoafi himborimayahi. Asu siheimbo ro aboedambofe-ndürimboayahi rani si tüküfeyoambe mafariheheandüri,” mehu. Se hoafi ra himboriyei! God ai siheimbo fehefembo aboedi si-ane tüküfeyo. Hapondanana God ai siheimbo aboedambo-fendürimbo yahumboani.

³Roana nindou bidifiri ai yihoefi ratüpuri ranahambo moaruwai-ane mbiseimboyei sefi hohumboanefi. Asu ro ṅgiri nindou ranahei himboahü moaruwai ratüpuri randihundani ai hoeindihindühi ranana moaruwai hohoanimoane mbisei. ⁴ṅga roana Godindi ratüpuriimbo nindoumboyahu nimboefombo wambo, asu muṅguambo si aho ra yihoefi aboedi ratüpuri rani-yaṅgir-ane muṅguambo nindou ranaheimbo yarihu nafuiyahundüri arihundi. Rananefi asu roana nine tiṅirifo yihoefimbo-so tüküfeyoane, asu afindi hohoanimo tüküfeyoane, ra moanane sefi hohu ṅginindi animboefi. ⁵Nindou ai yihoefimbo hariyahümuni, karabusirihimuni, asu mami afindi gugurihi mburihü moaruwaimbo-rihimuni arihundi. Asu ro gedühi ratüpuri mayefi hefi raniyefi ndofe apo, sesi, sesi raraokoateyefi arihundi. ⁶Asu ro sürühoeimbi hohoanimoyefühi yihoefi Godimbo fifirife ra ndorihu kikihirihumindefi arihundi. Yifiafi Aboedindi ṅginindi ranai yihoefi fiambe nimarowohüyo asu ro nindoumbo aboedi ndondorihundüri arihundi. Asu

ro nindou ranaheimbo Godindi ratüpuriyefi-rihundeimb-ane fi sefi hohu nafuyiyefi arihundi. ⁷Ro Godindi nginindinambo nimboefomboane fi asu ahandi-mayo hoafi hondü ra hoafiyefi arihundi. Ro mbumundi hohoanimo ra yifiari, niminehoari nou sahumindefi hohumboane fi animboefi rani-moatükuni ra raninambo yifiariyo rambohünda.

⁸Nindou bidifiri ai yihoefimbo didiboado-rihimunühi aboed-anemo sei, asu bidifiri ai yihoefimbo moaruwai-anemo sei arihundi. Bidifiri ai yihoefimbo amongoni hoafiyahümuni, nga asu bidifiri ai nindou bidifiramboya, aiana aboedi ratüpur-ane ratüpuremo sahümuni arihundi. Bidifiri ai yihoefimboya, aiana wosihofori hoafiyomo-rundeimb-anemo sahümünisi, nga asu roana hoafi hondü rani-yanğir-ane hoafiyefi arihundi. ⁹Ro Kraisindi hoafi sahumindefi hefi-rihundeimbi-mayefi ra nindou bidifiri ai moai fifirihimuni, nga asu afindi ai se rananemo sei hehi fifirarihimuni. Roana nindou ndeara yifimbo yanğiriyefisi, nga asu awi aboedi yanğiri animboefi. Yihoefimbo tinjirifo masemuniyosi, nga asu awi ro moai moaruwaimbo-yahundi. ¹⁰Ro afindi hohoanimoyefi arihundiyo, nga asu munğumambo si ra hihifi-hihifiyefi arihundi. Ro nindou moaruwai safi animboefisi, nga awi ro munğumambo nindou ranaheimbo afindi moatükuni aboedi sahundüri arihundi. Ro nindou kakikoate-ayefisi, nga asu ro napo afindeimbi nahurai-ayefi.

¹¹Wandafi mami Korinihündi, ro siheimbo hoafi nda himboahü hoafehundüri. Ro siheimbo yihoefi ngusüfoambe afindi hamindi hohoanimo-ayahundüri. ¹²Roana siheimbo hohoanimo kikirihumindefi himboyefühi-yefipoani, nga asu simbori seanei yihoefimbo moai yahurai hohoanimoyahümuni. ¹³Ro haponda siheimbo wandi nimorimbo nou hoafehandüri: Sihei hohoanimo ra yihoefimbo ngusüfo pandihimuni simbori ro siheimbo rawehundi nou.

Sihiri ana Godindi wor-ane fi

¹⁴Godindi hoafi anihondü-mbofekoate nindou rani-babidimbo ana se mami ngeimboyei, nga yowani. Nünğundine mbumundi hohoanimo asu hohoanimo moaruwai ra mamambemandinea? Nünğundine si-ane asu nimb-ane ra mami manimbafea? ¹⁵Nünğundine Krais-ani asu Satan-ani ai hohoanimo mami süngumandinea? Asu nünğundine nindou ai Kraisimbo anihondümboriri-randeimb-ani asu nindou ai ahambo anihondümbofe-koateyu-randeimbi ranai hohoanimo mami süngumandinea? ¹⁶Nünğundihu Godindi wori ra sanendi kabomo wori rani-dibo mamambe-mandifepira? İnga sihiri ana God Yanğiri Nünğumbü ahandi wor-ane fi! God ai ahandihoari hoafiyuhü yahuya, “Ro wandi wori ra wandi nindou rani-babidi worimbondühi mbundüha ahei mbusümo nimandimboyahi. Rananimbo ro ahei Godindahani asu ai wandi nendi-ndeimboyei,” mehu. ¹⁷Ranimboane asu Adükari ai hoafiyuhü yahuya,

“Se aheimbo hiniḡindihindüri hehi
sepoanimbo ḡgei nimandei.

ገga asu se moaruwai hohoanimo ra randihimboyei.

ገga rananimbo asu ro siheimbo wandihoari ndahamindiharü-
mboyahi. *Aisaia 52:11*

¹⁸ Rananimbo asu ro sihei apembondahe nimboahani,

asu se wandi nimorehi asu nindowenihi nimorimbondahi
nimboeimboyei,” *2 Samuei 7:14*

Adükari Muḡguambo ገḡinindi Hifandandeimbi ai ramehu.

7 ¹ Wandafi mami, Godindi-mayo hoafi ndanana sapo sihefimbo
hoafiyu masihend-ane. Rani-mayowamboane awi sihiri Godimbo
yihimbondefühi, sihefi fiambe-ane asu hohoanimoambe-ane nine
moaruwai hohoanimo ra hiniḡindihu hohu moani aboedi sürühoeimbi
yangiri hamindi nimboefomboane.

Korinihündi ai ḡgor-süḡgumarihindi ranahambo Por ai hihifi-hihifimayu

² Se wambo sihei ḡgusüfoambe hohoanimo pandihindiri. Roana moai
nindou ḡgorümbo moaruwai hohoanimoyahando rihandi. Asu ro moai
nindou ḡgorümbo moaruwai hohoanimo süḡgufembo yarihe rihandi.
Moai ro nindou ḡgorümbo tikai hoafiyahandowohü asu ahandi napo
kiahe hüsihamindi rihandi. ³ Ro sihei wami papifendüri hoafomböhünda
ndarihe hoafiyahühi-yahipoani, ḡga wani. ገga horombo hoafimayahi
nou siheimbo ḡgusüfoambe pandihuri ḡgefombo yifindemboyei. ⁴ Ro
siheimbo weindahi nda hoafehandüri. Roana siheimbo hihifi-hihifi
nafirihamindi-harümboanahi! Wambo-so tiḡirifo afindi tükefeyo-
amboani, asu ro siheimbo hohoanimo-yahandürühi, asu wandi
ḡgusüfoambe hohoanimo fufurifoa-reandirani ranimbo ro afindi hihifi-
hihifiya arihandi.

⁵ Horombo ro siheimbo hiniḡirihundüri hohu Masedonia hifihü
hefi tükümehundi amboa ranihü ro moai fi harihu nimarefi, ḡga
wani. ገga ranihü ana yihoefimbo-so tiḡirifombü hohoanimo afindi
ranai tüküfeyowohüyo, nindou ḡgorü-babidi simbori hoafiyefühüyei
ḡgusüfoambe yihimbomaramuni. ⁶ ገga awi God ai nindou düdi ai
tiḡirifombü hohoanimo ahandi fiambe tüküfeyoani aboedi fufurifoare-
randeimb-ani. Raniyo rani-simboani God ai Taitusimbo koamariheira
yihoefimbo-so süni tüküme fiyuwa asu yihoefi ḡgusüfoambe
fufuri-mafoareamuni. ⁷ Ai yihoefimbo sowana masünu ranimbo
yangiriyefipoani ramehundi, ḡga se ahambo sapo ḡgusüfoambe
didiboado-marihori hoafi ra semündü süni hoafimemun-amboyei
asu yihoefimbo God ai ḡgusüfoambe fufurima-foareamuni. Taitus ai
yihoefimbo hoafimemuni sapo se wambo hoeifendirühi mami hohoanimo

süngufembo afindi hohoanimomaye se wambo fehefendirimbo sei hehi hohoanimoaye habodei. Asu ranimboanahi ro hihifi-hihifayahi habodih.

⁸Ro pas siheimbo parihe koamari-heheandamboyeyi se moai hihifi-hihifiyeisi, nga asu ro moai ranimbo afindi hohoanimoyahi. Horombo ana ro afindi hohoanimoyahisi, nga hapondani ana aboed-anahi. Ro fifiriheandi, pas ra siheimbo afindi hohoanimo mbasagadürisi, nga ranana moani bodifoahü yanggir-ane. ⁹Haponda ro hihifi-hihifayahi se afindi hohoanimomaye ranahambo-yahipoani, nga afindi hohoanimo ranai sihei hohoanimo ra aboedi ngörü-süngumareandüra aboedi hohoanimoaye ranimboanahi hihifi-hihifayahi. God ai ahandihoari randüri siheimbo afindi hohoanimo ra masagadüri, nga ranimboyo asu wandi-mayo hoafi ranai moai siheimbo moaruwaimbo-reandüri. ¹⁰Wani, nga afindi hohoanimo God ai siheimbo rareandüri arandi ranana se ngörü-süngurihindani asu ai siheimbo aboedambofe-ndürimboayu ranimboane rareandüri arandi. Ranimboane se ranahambo afindi hohoanimoyo hoangopoani. Nga hifi ndanihündambo afindi hohoanimo ranai nindumbo moaruwaimbore arandi. ¹¹God ai siheimbo afindi hohoanimo masagadüri raninamboyo siheimbo aboedi hohoanimo tüküme feyo. Afindi hohoanimo ra siheimbo botimareandüra se botiyahi sihei hoafi ra didiboadofembo hohoanimomaye. Asu nindou ai moaruwai hohoanimomayu ranahambo nginindi hoafimayahündo asu se Godimbo yihimboyeyi marihüdi. Asu se wambo nimai hoafendirimbo hohoanimomaye. Asu nindou moaruwai hohoanimomayu ranahambo tijirifo saimbo hohoanimoaye habodei. Raniyo asu sihei hohoanimo ra yare weindahi tüküme feyo: Asu seana siheihori hütuyeipoani.

¹²Ro horombo pas ra siheimbo parihe koamariheheandisi. Nga asu roana moai nindou moaruwai hohoanimomayu asu ngörumbo moaruwaimbo-mariri ranahambo hohoanimo-yahahüyapoani hoafiyahi. Se yihoefimbo hohoanimoehümuni habodei ra God ai siheimbo nafuimbohünda ro pas siheimbo parihe koamariheheandi. ¹³Ranane asu sihei rani hohoanimo sünguyo yihoefimbo ngusüfoambe afurimareamuni.

Ro ngusüfoambe afurihu kürihu mamarefi yanggiryosi, nga asu ro hihifi-hihifimayefi amboani. Sapo munguambo se Taitusimbo hihifi-hihifi-yahündowohü didiboado-marihori ranimboyo ai-amboani hihifi-hihifimayu. ¹⁴Ro Taitusindi himboahü siheimbohünda borimayahi asu se ahambo aboedi hohoanimomahündo ranimboyeyi se moai wambo amoanngiyahündüri. Roana siheimbo moani anihondü hoafi hondüyo hoafiyahandüri marihandi. Rani-süngumboyo siheimbohünda Taitusimbo borimayahi ra anihondümayo. ¹⁵Taitus ai siheimbo sowahi tüküme fiyuwa se yihimboyehi hihamindariyei ahambo masahorimindei.

Raniyei asu muṅgambo se ahandi hoafi ra süngumarihindi. Se ahambo ramarihori ranimbo hohoanimoyuhüyu ai siheimbo afindi hohoanimomarendüri hu. ¹⁶Ro fifirihamboanahi se aboedi hohoanimo rani yanggiri süngundihi ṅgeimboyei. Ṇga ranimboanahi ro siheimbo hihifi-hihifi nafariha-mindihandüri.

Godindi nendi fehefembohünda kaki gugurimarihindi

8 ¹Wandafi mami, ro siheimbo Godindi hipoambo aboedi Kraisindi nendi Masedonia hifihü amarei aheimbo masagadüri ranahambo hoafindahundüri sefomboanefi. ²Aheimbo-so tiṅriffo afindi tüküme Feyondüra ai moaruwai napo-koate manimboeyosi, ṅga asu ai afindi hihifi-hihifiyeihi Godindi nendi bidifiri ranaheimbo farihefendürimbohünda kaki gugurimarihindi. ³Rani-moatükuni ra ro fifirih heheamboanahi siheimbo weindahi nda hoafayahi. Ai kaki nünṅunümbiyo saimbo masei ra masehündüriyosi, ṅga asu raniwami bidifiri parihi mburihümboyei masahündüri. ⁴Godindi nendi Sudia hifambe amarei ranaheimbo farihefendürimbo sei hehi ahei hohoanimonambo yanggiri yihoefimboya, se ranahambo yini yahomondan-animbo randihu sei hehi hoafimehümuni habodei. ⁵Horombo ro ai kaki digegimboyei sefi hohu hohoanimomayefi. Ṇga asu ai moai rani yanggiri rarihindi. Boatei ai Adükarindi yifiri ra süngufembo hohoanimomayei asu mare Godindi hohoanimonambo yihoefi yifiri ran-amboani süngufembo hohoanimomayei.

⁶Horombo Taitus ai hipoambofe hohoanimo ra sihei mbusümo botimareandi. Raniyefi asu ro ahambo rani ratüpuri ra mando rando ṅgafi moendindowandi sefi hohu hüti-hütimarihuri. ⁷Muṅgambo moatükuni se yarihi arihündi ranana aboedi hamind-ane. Sihei anihondümbofe hohoanimo, sihei sürühoeyoweimbi hoafi, sihei fifirife, sihei Godindi ratüpurimbo yifiri hohoanimo, asu yihoefimbo ṅgusüfo pefemuni hohoanimo, muṅguambo ra aboedi saf-ane. Mandihi yahurai hamind-animbo nindou fehefendürimbo kaki gugurindihindi asefi.

⁸Ro siheimboya, “Se randihindi,” saheheambo-yahipoani, ṅga wani. Ṇga nindou bidifiri ai aboedi ratüpuri ranahambo refembo sei hehi hohoanimomayei habodei asu ro sihei hohoanimo ra ai hohoanimomayei nou hohoanimombayeiyu, asu nünṅumbehi sahehea moani yarihe hoeiarheandi. ⁹Seana sihefi Adükari Sisas Kraisindi hipoambofe hohoanimo ra fifirihimboanei. Aiana muṅgu-moatükunimboya manüṅgu, ṅga asu siheimbo farihefendürimbo ranimboya ai nindou moaruwai napokoate nahurai tüküme fiyu. Se muṅguambo aboedi moatükuni afindeimbimbeyeia yahuhayamboya asu ai nindou napokoate nou manüṅgu.

¹⁰Haponda wandi hohoanimo-ane nda siheimbo hoafehandüri. Ṇgorü himbanifihüyo se nindou fehefembo kaki gugurife ratüpuri botimarihindi.

Ŋga asu se rani ratūpuri ra refembo boatei hohoanimomayei. ¹¹Se ratūpuri botimarihindi ra haponda moendindihindi. Horombo seana ratūpuri ra refembo hohoanimomayei habodei. Yahurai-animbo hapondani amboani nine kaki ŋgoro ranambo ratūpuri ra moendifembo amboani hohoanimondei habodei. ¹²Nindou ai nine-moatūkuni akidouyo, adūkariyo, nindou ŋgorūmbo saimbo hohoanimoyuhū asihendi ra asendi ana, Godindi himboahū aboed-ane. Asu kaki akidouyoweimbi ai kaki akidou asendi ana, Godindi himboahū moaruwaiyopoani.

¹³Roana se tiŋjirifo sahūmūndi nimareiani asu bidifiri ai aboedi mbimari sambohūpoani, ŋga se muŋgambo mami ndorihū mbimarei samboanahi. ¹⁴Hapondanambe ana sihei-mayo afindi napo ra nindou bidifiri ai mbonimboarihūmūndi ranaheimbo fehefendūrimbo ra aboed-ane. Ranimbo-animbo asu se-amboa mbonimboarihūmūndi ana, asu ai afindi digegindūhi amboani siheimbo mbifarihe-hindūramboane. Rani hohoanimō sūnguarihind-animbo muŋguambo mami ndondihū nimandeimboyei. ¹⁵Godindi hoafi yare hoafiyowohū yahoya, “Nindou dūdi ai afindi sesi asemūndu ana, ai ŋgiri afindi fondani digendi. Ŋga nindou dūdi ai akidou sesi asemūndu ai-animbo ŋgiri mbonimbondamūndu,” meho.

Por ai kaki gugurifembohūnda nindou Korinānambo koamariehpuri

¹⁶God ai Taitusimbo hohoanimō botimarira marihu ro hohoanimoyefi nou hohoanimomayua ranimbo ro Godimbo hihifimarihūni. Ai-amboani siheimbo farihefe-ndūrimboani hohoanimoyau. ¹⁷Ro ahamboya, ai ho siheimbo fehefendūrimbo yifirimayefisi, ŋga ai ahandi hohoanimonambo siheimbo sowana masūfu. ¹⁸Asu rananefi ro yihoe fi wandafi mami Taitusindi sūngu koarihēhura asūhūfani. Muŋguambo Kraisindi nendiyei himboahū nindou ndanai ana aboedi hoafi hoafimbo ra ndūrimb-ani. ¹⁹Asu rani yaŋgiriyo poani, ŋga ro nindou fehefembohūnda hahabodefūhi ratūpuriyefi arihundi, asu Kraisindi nendi ai ahambo ro-babidi hombo amboani koamariehori. Ro rani ratūpuri rawarihundi ra Godindi ndūri aboed-ane yahombohūnda ro nindou fehefendūrimbo hohoanimoyefi ra aheimbo nafuiyo-ndūrimbohūnda.

²⁰Kaki afindi masihendi ra ro hifandimbo ranahambo nindou ai hoafindei habodeimboyei sefimboane ahiniyefūhi nindou ra sahurimindefi ahefi. ²¹Roana aboedi mbumūndi ratūpuri hohoanimō ra Adūkarindi himboahū yaŋgiri ndofe refembo hohoanimoyefūhi-yefi poani, ŋga muŋguambo nindou ahei himboahū kameih-ane fi refembo asefi.

²²Ranimboanefi asu ro yihoe fi wandafi nda ahafandi sūngu koararīehuri. Ro ahambo afindimbo ratūpuri ra refembohūnda yarīhuri hoerīhurane, asu ai rani-moatūkuni refembo yahuhaya ŋgusūfo

pamareandi. Hapondani ana se mbumundi ratüpuri hohoanimo rani yanggiri süngumbirihinda yahuhayamboani nginindi anihondümboreandi. Ranimboane asu ai rani-moatükuni ranahambo refembo ra ngusüfo parareandi. ²³Taitusimbo se randihori fifindihori. Aiana wandi wandafiyu haya, asu siheimbo farihefe-ndürirambo ro mami ratüpuriyehihoandeimb-ani. Iga asu yihoefi wandafi yimbu ranahafanimbo-animbo se randihi fifirindihipiri: Nindou yimbu aiana Godindi nindouyei ratüpuri ratüpuriyafani rinandühi asu ai ahafandi ratüpuri raninambo Adükarimbo ndüri adükarümb-ani safani-rinandeimb-anafani. ²⁴Se ahafanimbo sihei hipoambofe hohoanimo ra nafuindahüpiri. Ranimbo asu Kraisindi nendi munguambo ranai sihei hipoambo hohoanimo asu ro siheimbo moani bori yanggiri boriyefühi-yefipoani ra ndorihififirimbirihind-amboane.

Godindi nendambo farihefembo kaki guguri-ndihimboyei

9 ¹Godindi nendambo farihefembo kaki gugurihi arihündi ranahambo se fifirihimboane. Iga ranimayowamboane asu ro nggiri siheimbo asükainda pas pandihe koandiheheandi. ²Ro fifirihhearümbonanahi sihei hohoanimoambe nindou nggörümbö fehefembo hohoanimoaye ra. Iga ranimboyahi ro Masedoniaye himboahü siheimbo borimayahandüri. Ro aheimbo rarihe hoafiyahandürühi sahiya, “Igorü himbanifihyo wandafi mami Akaia^a hifihü amarei ai rani ratüpuri ra süngufemboane sei hehimbomaye,” masahi. Raniyei asu se rani hohoanimo botifembo hohoanimoaye hoafi ra himboriyei hehi asu rani-moatükuni ra ai-amboani refembo sei hehi ngusüfoambe botimareandüri. ³Ro siheimbohünda borimayahi ra hoafi yanggiri tüküfembo moeisahi. Iga se farihefe-mbohünda kaki ra nafindhümindü nimandei, nga ro nindou ndanahambo hoafimayahapuri. Ro ranahambo hohoanimoaye hoefiheanda mayowamboanahi asu ro wandafi mami nggimi ndanahamumbo siheimbo sowana koandiheheapura difomboemo. ⁴Ro anihondümbö-rihumboanefi se nine-moatükuni sairambo ra nafirihümindü mbamarei. Asu Masedonia ai ro-babidi kosimo hoeirundürani, se nafemindü nimarikoate-ndeiani, ro amoaningi-ndemboyei asu se-amboani amoaningi-ndeimboyei. ⁵Ranimboanahi ro hohoanimoaye hoefiheanda mayoa asu wandafi mami nggimi nda boatei siheimbo sowana mbikosomonda sahehea hohoanimoayahi habodihü. Ranimbo asu ai difomo siheimbo-so tükündafu siheimbo fandihoundüri mbundu sopo se nine-moatükuni saimbo masei ra didiboadondihi digehindi. Ranimbo asu ai randu fifirindumboemo rani-moatükuni sihei hohoanimonambo masihendi, nga ro sihei-mayo moani sahumündefühi-yefipoani.

^a 9:2 Korin ngoafi ai Akaia hifih-ane anango.

⁶Wandafi mami, se randihi fifirindihindi: Nindou düdi ai nini-moatükuni maŋgiriyo akidou safi hifareandi ranai ana süngunambo ranahandambo sesi safi ra akidou ndemündümbui. ⁷Ŋga asu nindou düdi ai maŋgiri adükari hifareandi ranai-animbo sesi ranahandambo adükari hisindowa ndemündümbui. ⁷Nindou muŋguambo mamami se sihei ŋgusüfoambe hohoanimondei hoeindihindüh-animbo, asu se rani-moatükuni saimbo masei ra moani ndehindi. ⁷Ŋga asu nindou mami ai ahandi ŋgusüfoambe moaruwaimbo-nderühi rani-moatükuni saimbo ranahamboya, nindou ai wambo hüti-hütimaründir-amboanahi ro wandi rani-moatükuni ra maseheandi mbüsümbui. ⁷Ŋga wani. ⁷Ŋga God aiana nindou hihifi-hihifiyuhü moani saimbo yaŋgiri hohoanimoyu ranahamboani hohoanimo parariri. ⁸God aiana siheimbo muŋguambo afindi aboedi moatükuni ra dagadürani asu se aboedi moatükuni afindeimbi-ndeimboyei. Rananimbo muŋguambo si aho ra mbonimboe-mindikoate afindi digehimboyei asu nindou farihefembo ra afindi yagodomboe. ⁹Godindi hoafi ranahambo yare hoafiyowohü yahoya, “Nindou düdi ai nindou napo-koate-maye aheimbo warambe kikihemindikoate-ayu
ra nindou ahuri bubufoareandi nahurai-ani.

Ahandi mbumundi hohoanimo ranai koadürümbo-koadürümbo yagodimboe,”

Buk Song 112:9

meho. ¹⁰God ai sesi maŋgiri nindou nümbürira-randeimbi ranahambo sagado asu mamikarambo sesi sesimbo sagadüri arandi. Ranimbo-hündambo-animbo asu God ai siheimbo afindi moatükuni dagadürani asu se digehi hehi ahandi nendi ranaheimbo fandihehi-ndürimboyei. Rananimbo sihei fehefembo hohoanimo ranai afindi hamindi tükündifemboe nindou nümbürambeahindi moatükuni hifireanda afindi hisayo nou. ¹¹God ai siheimbo afindi aboedi moatükuni dagadürani asu se muŋgambo si warambe kikihemindikoate ndehimboyei. Rananimbo asu sihei-mayo kaki aheimbo asehindi yihoefi warihü ra ndahümündi hehi asu Godimbo hihifi-ndihorimboyei. ¹²Se rani ratüpuri rawarihindi ra Godindi nindou ranai nine moatükuni mbonimboa-rihümündi ranahambo farihefe-ndürimbo yaŋgiriyo poani, ŋga ai rani-moatükuni ra hoerihindühi Godimbo afindi hihifimbirihorambo kameihane. ¹³Rani ratüpuri se rawarihindi ranana sihefi wandafi mami ranaheimbo farihefe-ndürimboane, ŋga asu rananimbo rani-moatükuni ranai weindahi hamindi tükündifemboe. Rananimbo asu wandafi mami ranai randihi fifirindi-hindühimboya, seana Kraisindi aboedi hoafi ranahambo ndorihi sünguri-hindühanei mbisahündüri-mboyei. Asu muŋguambo nindou se aheimbo kaki sihei hohoanimonambo yaŋgiri warambe kikihemindikoate asehindi ranimbo ai rarihi hoerihindani wani asu ai Godindi ndüri ranahambo aboed-ani mbisei-

amboane. ¹⁴Rananimbo Godindi hipoambo hohoanimo sihei fiambe amaro ra ai hoeimbirihind-amboane. Rananimbo asu ai siheimbo hohoanimo-ndühindürühi amboani asu ai Godimbo siheimbohünda didibafimbe-yahüindowamboane. ¹⁵God ai moani aboedi hamindi moatükuni masemuni ranahambo nggiri sihiri wudipoapondihu nimindi hoafi ra wataporimbo-ndihundi, nga ahambo hihifi yanggiri hihifindi-hurimboane.

Nindou ai Porimboya aiana Kraisindi hoafi semündü hu-randeimbi hondüupoani masei ranaheimbo simbori hoafimayu

10 ¹Nindou bidifiri ai wamboya, “Por ai ro-dibo nunguambe afure manüngu, nga ai-poanimbo nunguambe rani-simboani yanggiri yihoefimbo pasambe nginindi hoafiyumuni marandi,” ase. Ro Por-anahi haponda wandihoari pas ndaname siheimbo Krais ramefiyu nou himboari hoafendahü hipoamborihearühi hoafayahandüri. ²Ro siheimbo nginindi hoafimbo moeisahi, nga se wambo amongoni hoafindeiani ana, asu ro siheimbo-so dügühani siheimbo nginindi hoafindamboayahi. Nga nindou didiyei ai wamboya, aiana hifi ndanihündambo hohoanimo ranane süngware hu ase ranaheimbo-animbo ro yihimbokoate nginindi hoafindaha-ndürimboyahi. ³Ro nindou yanggir-ane fisi, nga asu ro moai nindou-yafe hohoanimo süngurihündühi yifiariyefi rihundi. ⁴Munguambo yifiari niminehoari sahumi-ndefimboayefi ra hifi ndanihündambo-yopoani. Nga wani. Nga ranana Godind-mayo nginindi yifiari niminehoar-ane. Ranana hürütümbü nindou-yafe nginindi hifinambondeamboe. Ranamboane wosihofori hohoanimo ra raguanambo-arihundi. ⁵Asu nine-moatükuni ai Godimbo fifirifimbo-mayo ranahambo nafi gürareandi ra hifinambo-ndihumboyefi. Asu munguambo sihefi hohoanimo kikihiri-hümündeihü Kraisimbo yanggiri hohoanimo pambirihinda asefi. ⁶Se Kraisindi hoafi rani yanggiri süngundühi mbundihümbo-animbo asu sehüdü bidifiri ai süngufekoate-ayei ranaheimbo tñjümbi hohoanimo ndahu-ndürimboyefi.

⁷Seana nine-moatükuni hoeiarihindi ranahambo wudipoapondühi türüboadihi hohoanimondei. Nindou mami ai hoafiyuhüya, roana Kraisindi nindou hond-anahi ehü ana, awi ai rande wudipoaponde hohoanimondühü ro-amboani ai rawefiyu nou Kraisindi nindou-ane fi mbeyahu-wamboane. ⁸Sihei anihondümbofe hohoanimo ra nginemindi-ndürimbo-hündamboyu Adükari ai yihoefimbo ndani ratüpuri nda masemuni. Rani-moatükuni ranana siheimbo moaruwaimbofe-ndürimbo-yopoani. Nga asu ro ndani ratüpuri ranimbo wandihoari akidou borayahi ana, asu ranimbo ro moai amoaningiyahi. ⁹Se randihi hohoanimondeihüya, “Por aiana ahandi pasambe hoafi raninambo yihimboaramuni,” mbiseimboyefi. ¹⁰Nindou bidifiri ai randihi hoafindeihü

animboya, “Porindi-mayo pas ranana tiñumbi saf-ane. Ijga ai sihefi fikimi nüngumbo ana, ai himboari hoafendi safi nüngumbo asu hoafi ahandi ra ndorihfekoaate-ane,” sei arihündi. ¹¹Nindou düdi yahurai hoafiyu arandi ranai ana rande ndonde hohoanimondühi türüboadeandi. Ro anguni nimboefimbo pasambe hoafayef-ane, asu siheimbo-so ranihü nimboefimbo hoafehundür-ane, rani moatükuni ra ngorüpoanimboyopani, nga wani.

¹²Roana ngiri yihoefihoari yihoefi fi ra simongorindihu hoeindihu ndihundi nindou bidifiri ai ahamundi fimbo borayomo nou. Nindou ranai ana moani ahamundi hohoanimonambo yanggir-anemo ai ahamundihoari ngorü ahandi hohoanimo ra ngoründi-mayo hohoanimo ranifihi simongoru hoeiru arundi. Yahurai nendi ana fifirifekoaate-anemo! ¹³Ijga asu ro yihoefi fimbo ana ratüpuri yihoefi ranahambo simongori ra ngasündife hefe boriyo ho ranahambo moei asefi. Ijga nine-moatükuni ratüpuri God ai yihoefimbo masemuni rani simongorühi animbo ngemboyefi siheimbo-so ratüpurimbo kameihi amboani. ¹⁴God ai yihoefimbo ratüpuri masemuni rani hoarehi se animboei. Rani-simboani ro siheimbo sowahi tüküyahundühi Kraisindi Aboedi Hoafi ra sahumindefi hohu siheimbo hoafimehundüri. Raninambo God ai yihoefimbo ratüpuri masemuni rani yanggiri süngumarihundi. ¹⁵Roana moai God ai ratüpuri nindou ngorümbo masagadüri ranahambo boriyefi hefi rihundi, nga wani. Ijga roana sihei anihondümbofe ranai ngoani asu ro sihei mbusümo ratüpurimbohünda God ai rani ratüpuri masihendi ra refeyowani aboedi adükari tüküfembo ranahamboane anihondümbo himboayefi. ¹⁶Ranimbo asu ro aboedi hoafi ra ndahumindefi nindou bidifiri sihei hifi daboadani amarei ranaheimbo hoafindahundürimboyefi. Asu ro ngiri nindou ngorü ai ratüpurimayu ranahambo borindefi.

¹⁷Bukambe yare hoafiyowohü yahoya, “Nindou düdi ai borimbo hohoanimoyau ana, moani Adükari ai nine-moatükuni ramareandi ranahambo yanggir-animbo borimbiyu-wamboane,” meho. ¹⁸Nindou düdi ai sapo nine-moatükuni ramareandi ranimbo ahandihoari borayu ana, Godindi homboahü ndürimbüyupoani. Ijga asu Adükari ai nindou daboe ndürimb-ani ehu ana, nindou ranai ndürimb-ani.

Por ai se Kraisindi hoafi wosihoafori hoafiyomorundeimbi ahamundi hoafi himboriyo-poani mehu

11 ¹Awi se wambo rarihi hiniñgirihindirani-animbo asu ro hihindi hoafi hoafinda. Ijga se wambo hiniñgiri-hindirimboanei. ²Awi ro ngusüfo parariheandüri God ai siheimbo ngusüfo parareandüri hu nou. Seana moani nimorehi yihoarifi hamindi nindowenihi mami ranahambo yanggiri segodombo sei hehi diboniyei hiniñgarihindi nahurai-anei.

Nindowenihi mami ranai ana Kraisi ranani. ³Sapo amosiri tikai hoafi fifireandeimbi hamindiyo haya Ifimbo tikai hoafimendo ranahamboanahi ro afindi hohoanimoayahi. Siheimbo-so amboa hohoanimo yahurai tükündifendürani, asu sihei Kraisi simbo hohoanimo aboedi ngusüfo pamarihori ranai moaruwaimbo-ndifemboe saheheamboanahi ro yihimboayahi. ⁴Nindou bidifiri ai siheimbo-so tüküyafu Sisas sapo ro bokarihehu arihundi ranahamboemopoani, nga ngorü-poanimbo Sisas ranahambo bokarihou rundühanemo. Asu se ngorü-poanimbo yifiafi masahümündi, nga ro Yifiafi Aboedi ranahambo hoafiyefi arihundiyo poani masahümündi. Asu se ngorü-poanimbo aboedi hoaf-ane sahümündi arihundi, nga aboedi hoafi ro sinefi hoafiyahundüri marihundi raniyo poani. Nindou bidifiri ai rani hoafi ra hoafiyomondürani asu se rarihi hiniñgirihipurani yahurai hoafi ra hoafiyomo arundi.

⁵Ro siheimbo hoafehandüri, nindou ranahamumbo Kraisi ndi hoafi sowandümo homo-rundeimbi nindou bogor-anemo ase ranahamundi hoarehi nimboambo-yahipoani. ⁶Yini anihond-ane, hoafi hoafiyorambo ra ro aboedi hamindi-yahipoani, nga fifirife ranana ro moai mbonimbo-rihamindihi. Muñguambo moatükuni hohoanimo ro rarihu marihundi ra siheimbo rani fifirife raniyo muñguambo nafuiyahundüri marihundi.

⁷Se fifirihindi roana siheimbo Godindi-mayo aboedi hoafi hoafiyahandüri marihandi ranimbo-hünda moai kaki napombo semindimbo wariyarihandi. Ro siheimboya, ai-animbo nindou aboedi hamindi tükümbeyahindi sahehea asu wandi fimbo ro hifinambo-riheandühi himboari hoafendühi hoafiya marihand-ane. Asu rani-moatükuni ra nimboea? Refe-ana awi wandi hohoanimo ranambo ro moaruwai hohoanimombayahiyo? ⁸Ro siheimbo farihefendürimbohünda Godindi nendi ngorü ngoafihü amarei ranai wambo kaki akidou sehi rihünda masahamindihi. Ranimbo-hündamboayahi ro ahei-mayo kaki ra moani hühmbühünimbo fufurihamindimbo nahuraimayahi. ⁹Ro se-babidimbo ranihü nimboahi simboani ana ro kaki-napo yahurai sihefe-koate mbonimbo-rihamindihi moai nindou mami sihei mbusümo ahambo tiñirifo sahando, nga wani. Iga wandafi mami Masedoniahündi ndanihü sühüsi tükümehindi aiyei nine napo ro sihefembo mbonimbo-marighamindihi ra masehindiri. Horombo maho-ane, asu süngunamboane ro ngiri siheimbo tiñirifo ndahandüri. Iga ro rani hohoanimo ra sünguri-heandühanahi. ¹⁰Kraisi ndi hoafi hondü ra wandi ngusüfoambe nimarimboane, ranane asu ro siheimbo anihondümbo hoafehandüri: Hohoanimo ra ro süngurihe arihandi ranahambo borayahi ra ngiri Akaihi hifihü ngorü nindou ai wandi bori hoafi ra kikindeandi. ¹¹Nimboe ro siheimbo tiñirifo saikoate-ayaha? Ro siheimbo ngusüfo pefindürikoate-wamboayahi? Iga wani. God ai fifireamboani ro siheimbo ngusüfo parihendüri arihandi ra.

¹²Ro haponda nine ratūpuri rawariheandi ra ro moani rani yangiri ratūpuri-yahūhanahi, nindou bidifiri ranahamumbo nafi gifepurimbohūnda. Ai ŋgomondūhiya, roana Por mami ratūpuriyomo arundi yahurai-aneŋi ratūpuriyefi arihundi mbisimo houmbo borindimboemo sahehea. ¹³Nindou ranai ana, Kraisindi hoafi sowandūmo homo-rundeimbi hondūyomopoani. Aiana ahamundi ratūpuriyomo arundi ranahamumbo tikai hoafiyomo rundūhanemo nindou amuri ranahaimboya, ai Kraisindi hoafi sowandūmo homo-rundeimbi hond-anemo sei hoafimbiyeiya yahomo houmbo. ¹⁴E! Asu se ahamundi hohoanimo ranahambo afindi hohoanimo-ndeimboyei. Satan ai-amboani ahandi fi ra ŋgorū-sūngure haya sūnambeahindi nendi-yomondi si ranimbofi haya tūkūfi arandi. ¹⁵Ranimboane Satan ahandi ratūpuriyomo-rundeimbi nindou ranai nindou ahei himboahū aboedi mbumundi ratūpuri-yomondeimbi rani hoearambeyafu tūkūyafunda ranahambo heptūnifepoani. Nindou ranai ana sūngunambo rani-moatūkuni ramarundi simoŋgorūhi asūbusi ndowandūmboemo.

Por ai Godindi ratūpurimbofi nūngumbo tiŋirifo masemūndu

¹⁶Ro asūkai hoafayahi: Nindou mami ai wamboya, aiana hihindi-hindindiyuhani mbūsū haya hohoanimondimbui, ŋga yowani. Se wambo randihi hohoanimombondeihi ana, ambesi, ŋga wamboya, aiana hihindi-hihindiyumb-ani mbisahūndiran-animbo asu wandi fimbo borinda habodimboanesi. ¹⁷Ro haponda ndarihe hoafayahi nda: Adūkarindi hohoanimo sūngu hoafiyambo-yahipoani, ŋga wani. Ŋga ro moani wandihoari hihindi-hihindiyahūhiyahi ro rarihe boriyahūhi hoafayahi. ¹⁸Nindou bidifiri ai hifi ndanihūndambo hohoanimo sūngu homondūhi siheimbo-so homo ahamundi fimbo boriyomo arundi rananimbo asu ro-amboani wandi fimbo mandihe yahurai borindamboya.

¹⁹Seana siheihoarimboya, “Ro hohoanimo aboedi fifirihu-ndeimbanefi,” aseisi, ŋga ranimboanei se hihindi-hihindiyomondeimbi nindou ranahamumboya, “Ambemo, ŋga moani ai rani hoafimbeyomo,” asei. ²⁰Seana nindou ranai siheimbo moani hoafemo sūngufembo yangir-anei hohoanimoaye. Asu sihei-mayo napo fufemindi, ahamundi wosihoafori hoafi ranambo siheimbo semūndūndūrane, siheimbo moaruwai-moaruwaimbo-arundūrane, asu ŋgusūmboarambe pakararihūndū-ane, rani-moatūkuni ra rarundan-ane asu seana ahamumboya, ai ambemo asei. ²¹Rani-moatūkuni hohoanimo ai rawarundi ranahambo ana awi ro ŋginindi hamindiyefipoani.

Ŋga asu nindou ŋgorū ai ahandi fimbo borimbo ehu-ana, ro-amboani, awi hihindi-hihindiyahūhi hoafayahi, ŋga wandifimbo borindamboya. ²²Nindou ra Hibruhūndi-yomosi? Ŋga ro-amboani Hibruhūnd-anahisi. Asu ai Israerihūndi-yomosi? Asu ro-amboani Israerihūnd-anahisi.^b ²³Ai Kraisindi

^b 11:22 Hibruhūndi ai Abrahamindi ahuri hond-anei. Israerihūndi ai Suda-yafe Godimbo hohoanimo sūngurihi arihūnd-anei.

ratüpuriyomo-rundeimbi-yomosi? Awi ro hohoanimokoate nindou-anahi, nga roana ratüpuri ra refembo ahamumbo ngasindi-heapurimboanahi. Roana ratüpuri ra afindi hamindi tijirifoya, afindimbo karabusiyaha, afindimbo wambo buburundi, ramarundi-anesi. ²⁴Wambo hondahüfeimbimbo wofi bogorinambo Suda 39 amberamindeimbiyo bubumarundi. ²⁵Romihündi ai wambo ngimimbo nimiharinambo buburundi. Asu mamimbo nimoeinamborundi, asu ngimimbo ro nimariheimbi sip ranai himoni hihirimafaoreandi asu ro mami si himoni yanggiri boboriya wakimariheand-ane. ²⁶Ro afindimbo hahabodi marihandi ranambe hohoambumbo ha asu hümbuhüni nendi afindi yanggorambe ha marihandi. Asu ranambe yanggiryopoani, nga Sudahündi wandafi mamaye ai Suda-yafe ndifoyei ai wambo moaruwaimbo-marihindiri. Adükari ngoafihüyo asu nimambe nindou ningokoate-reandühi ranamboani ro moaruwaimbo-fembo yanggiriya marihandi. Siriwara himoyo asu tikai ngunindiyomo ranambe ro moaruwaimbo-fembo yanggiriya ha marihand-ane. ²⁷Ro rani-poani rani-poani ratüpuri afindi safiyo ratüpuriya marihandi. Afindimbo ro nimbokoani gedühi moai ndorihe apo rihandi. Wembombo-yarihandühi asu wandi amindasümo ranai hoe simindimbo kikire-yaparihoai marandi. Ro sesi afindi sihefe, wori aboedambe nimari, hoeari aboedi güdüfe raraokoate-ya marihand-ane. ²⁸Rani-moatükuni yanggiryopoani wambo-so tüküfe marandi, nga wani. Muŋguambo si maho ra Godindi nindou ngorü ngoafihü amarei ranaheimbo hifandiyondürimbo hohoanimo ranai-amboani tüküfeyo-aniyahi ro tijümbi hohoanimo sahamindi marihandi. ²⁹Nindou düdi ai nginemindi-koate-ayu ana, asu ro-amboani nginemindi-koate-anahi. Nindou ngorü ai rareanda ngorü ai moaruwai hohoanimoayu ana, asu ro ngusüfo nimbiyahühi nimari arihandi.

³⁰Ro borimbo asahi ana, sapa ro nginemindi ningokoate animboahi ranahambo-animbo borinda habodimboyahi. ³¹God ai God-ani asu Adükari Sisasindi Afind-ani ranahandi ndüri koadürümbo-koadürümbo aboed-ani seihanei. Ai wambo fifireandiri ro tikai hoafiyo rakoate anihondümboanahi hoafayahi nda. ³²Ro Damaskus ngoafihü nimarihambe bogori nindou rani ngoafi hifanda-randeimbi adükari bogori Arestasindi hoarehi mamaru. Nindou ranai wambo kikihemindi mburimbo karabusi-fendirimbohünda ami bidifiri ngoafi giniri nafitambe fikimi hiniŋgi-mareapura maningomo. ³³Ŋga asu wambo ngoafi giniri ranambe nafi wandafi mami bodimondi ai basketambe wofi kuru mburu foarundiri houmbo masafoarundira aboedambomeheandi.

God ai Porimbo afindi moatükuni nafuimeindo

12 ¹Ro borinda ngamboyahisi, nga asu ranana ngiri siheimbo fandihendi. Ambesi, nga hapondan-ana wambo Adükari ai yafogoadinambo nahurai muŋgu-moatükuni sünguna weindahi tüküfemboayo weindahi-mareandiri ra siheimbo wataporinda samboanahi.

²Ro nindou mami Krais-dibo nungumbü fifirarihini, nga 14 himbani maho ranambe ranahambo God ai serümundü nimoamo hondü sünambe mahafu. Rani-moatükuni ra roana moai fifiriheandi, nga moani nindou safimbayo asu yifiafi yanggirimbayo, nga God aiani ra ffireamboayu. ³Ro fifiriheandi nindou ranai Godindi ngoafi sünambe moani aboedi hamindi ranambe nimehünou hasifi tüküfi mahafu. Nga asükai ranahambo amboa ro moai fifiriheandi, nindou safimbayo asu yifiafi yanggirimbayo, nga God aiani ranahambo ffireamboayu. ⁴Raniyu asu dibohindi moatükuni nindou ranahambo ngiri hoafindei hoafi ra ahandi himboambenambo himborimayu. ⁵Ro nindou ranahambo-animbo borindamboyahi, nga wandi fimbo ngiri borindahi. Nga wandi fi nginindikoate-yaheimbi ranahambo yanggiri wandi fimbo borindamboyahi. ⁶Ro nini-moatükunimboyo borimbo mbasahi-mbonana, asu ro ngiri hihindi-hihindiyaheimbi nindou-anahi mbisahi sapo ro rarani-moatükuni ranahambo anihondumbo-animbo hoafindamboyahi. Nga wandihoari borimbo moei asahi rananimbo nindou ngiri wambo aboed-ani mbisahündiri. Nga ro nine ratüpuri rawariheandane, asu nine hoafi hoafayah-ane, ranimbo nindou ai hoeirihindirühi wambo wudipoapondihi fifirindi-hindirimboyei.

Porindi fihî tihoari nahurai kamareri

⁷God ai wamboya, nini ngorü-poanimbo moatükuni ai hoeimareandi ranahambo ahandi fimbo borindimbui yahuhamboyu, mami moatükuni tihoari nahurai wandi fihü futimareandiri. Rani-moatükuni ramareandi ranana Satanindi ratüpuriyu-randeimbi nindou nahuraiyu wamboya, ahandi fimbo borindu hoangumbui yahuhaya hifinambo-fendirimbohünda hariyondirimbo mehu. ⁸Adükarimbo rani-moatükuni ra fimbirihenda sahehea ro ngimimbo didibafimeheando. ⁹Raniyu asu ai wambo simbori yare hoafiyundirühi yahuya, “Wani, nga wandimayo hipoambofe hohoanimo ranana awi se-dibo ndear-ane, nga wandi nginindi ranana nindou hamindi kemindikoate-ayei ranaheimbo so-ane tüküfe arandi,” mehuamboya. Asu ro sahiya, hapondan-ana ro hamindi kemindikoate-anahi ranahambo hihifi-hihifindahühi borindamboyahi Adükarindi-mayo nginindi ai wambo hamindi nginemindi-ndiramböhünda. ¹⁰Ranane asu ro hamindi kemindikoate-ayahi, nindou ai wambo moaruwaimbo-rihindiri, tingümbi hohoanimo tükefeyondiri, nindou ai moaruwaimbo-moaruwaimbo-arihindiri hei, ranahambo Kraisimbohündambo ro hihifi-hihifayahi. Ro hamindi kemindikoate-ayahi ana, asu rasimboani ro nginindi nimboamboanahi.

Por ai Korinöhündambo afindi hohoanimo-ayundüri

¹¹Ro ndani hoafi hoafimayahi ra hihindi-hihindiyaheimbi nindou nouyahi hoafimayahi, nga wambo se ngusüfoambe botimarihi-

ndiramboyahi rani hoafi ra hoafimayahi. Iḡga simbori se-animbo wandi aboedi hohoanimo ranahambo hoafindahündiri, ḡga asu se moai rarihindi, ranimboyahi asu wandihoari rani hoafi ra hoafimayahi. Yini, anihond-anesi, roana ndorihehea-ndeimbi nindou hondüyahipoani, ḡga Kraisindi hoafi sowandümo homo-rundeimbi nindou “rani-poanimbo” ase sihei mbüsumo aniḡgomo ranahamundi hoarehi nimboamboyahipoani. ¹²Ro hohoanimoya kikihirihe heheamboayahi Kraisindi hoafi semindi ho-rambo ratüpuri sihei mbusümo nimboambo rani ratüpuri ra ramariheandi. Godindi ḡginindi nafuimbo ratüpuri asu hepünifeimbi moatükuni ratüpuri ra sihei mbusümo ramariheandi Kraisindi hoafi sahamindi ha-rihandeimb-anahi sahehea nafuimayahi. ¹³Siheimbo ramariheandüri nou-ane asu Kraisindi nendi ḡgorü ḡgoafihü amarei aheimbo amboani rariheandüri arihandi. Ro moai siheimboya, wambo sesi-napo sehindiri sahehea siheimbo tiḡjirifo sahandüri, ḡga wani. Karihasihandüri, ḡga se wambo amboawi mbisahündiri ro siheimbo tiḡjirifo segodürükoate-mayahi ranimbo-hünda.

¹⁴Hapoana ḡgimimboanahi nda ro siheimbo sowana sifombo saheamboayahi, ḡga asu ro ḡgiri sihei-mayo napofihü yangiri kiarimbohünda tiḡjirifo-ndahandüri. Iḡga roana sihei kaki-napo semindimboyahipoani, ḡga siheimbo fehefendürimbo yangir-anahi. Rarani moatükuni ra se fifirihindi nimori akidibou aiana boagirambo fehefe-ndürimbohünda ḡgiri sesi-napo kokoboadihi ndahümündi tükündahi digehindi, ḡga wani. Iḡga simbori boagiri ai-animbo nimorambo rani-moatükuni ra didiboadofe sihefemboane. ¹⁵Siheimbo farihefe-ndürimbohündambo ana wandi-mayo napo eḡgoro ra segudürimbo wandi fimbo kameihi hihifi-hihifiyamboanahi. Ro siheimbo afindimbo ḡgusüfo pandiheandürani asu se simbori wambo akidou yangiri ḡgusüfo pamandihindiriyo?

¹⁶Anihond-ane, ro sihei-mayo kaki-napo semindimbohünda moai siheimbo tiḡjirifo sahandüri. Iḡga asu nindou bidifiri ai seiya, “Yinisi, ḡga sihefi kaki-napo semindimbo-ana, ai tikarehayambo ḡgorü-süḡgundeamuni mbunda ndemündumbui,” masei. ¹⁷Iḡga asu nüḡgufemboyoa? Asu ro wandi nindou bidifiri siheimbo sowana koamariheheapuri ranai sihei-mayo napo ra moai kiafu hüsiḡndümo. ¹⁸Ro Taitusimbo siheimbo sowana sinimbohünda hoafiyahando habodihühi asu ahandi süḡgu wandafi mami koamarihehina masinu asu Taitus sihei-mayo napo kifi hüsiamünduwai? Iḡga ra ai wani. Nindou ranai ro hohoanimoayahi hohoanimo süḡgure hayambo ro rawariheandi rani-süḡgu yare randühüyo? Asu ro ai-dibo mami hohoanimo süḡgurihoandühi nine-moatükuni rarihoandühüyehi.

¹⁹Se hoafi ra rarihi hoeirihindühüyo yihoefimboya, aiana ahamundihoari aboedi hoafimbohünda sürü papimbarundi seimboyei?

I, ra wani. Ro haponda siheimbo hoafehandüri roana Kraisindi nindou hondümboyaho nimboemboanehi, ranane asu rani hoafi ra Godindi himboahü sihei ngusüfo ra ngininemindürimbo-hündamboanahi rarihe hoafehandüri, nga yihoefi fimbo hoafiyambo-yahipoani. ²⁰Ro siheimbo-so tükeheandi ra asu siheimbo aboedi hoeifendürimbo samboanahi, nga asu se ngiri aboedi nimandei sahehea ranimbo yihimboyahi. Asu simbori amboani se wambo hoeindihindirani nindou yahurai se hoeifembo sei hehi hohoanimoyei yahurai ningokoate-ndamboayahi. Ro akidou yihimboyahüh-anahi rani-moatükuni ranahambo ro ndarihe hoafayahi. Sihei mbusümo yifiari, wandafi ngortumbo hohoanimoy moaruwai hohoanimoyondo, simbori watikoafi, afindi-afindi hohoanimoy, tirifoefe hoafi, daboadani hoafi, ahandi fimbo yangiri hohoanimoy, mamikari hohoanimoy mungu-moatükuni ra yahurai tükündifemboe sahehea yihimboyahühi hoafayahi. ²¹Ro siheimbo sowana dügühani wandi God ranai wambo sihei himboahü amoaningambo-ndeandirimbui samboanahi ro yihimboayahi. Asu ro nindou bidifiri horombo moaruwai hohoanimoyei mburihumbo asu ai nimorehi sisihimo, nindowenihi birabiri hohoanimoy, ngusüfoambe botife hohoanimoy ranahambo daboadanambofe-koate-mayei ranaheimbo, hoeindihe-andürani wani amoaningindahühi aranindamboayahi. Ranahambo wambo God ai hifinambo-ndeandirimbui saheheamboanahi akidou yihimboayahi.

Bidifiranambo ahini hoafi asu hihifi hoaf-ane

13 ¹Haponda ndeara ngimimboanahi siheimbo hoeifendürimbo sifombo asahi. Bukambeahindi hoafi ranai yare hoafiyomunühi yahoya, “Nindou yimbuyo ngimiyo ai anihondumbo hoafindomondühiya, ‘Ro hoeirihumboanefi nindou mami ai moaruwai hohoanimomayuwa,’ mbisimondan-animbo, awi sihiri rani hoafi ra didiboado-femboane,” meho. ²Nindou didiyeyi horombo moaruwai hohoanimomoyei ranaheimbo haponda asükainda hoafinda samboanahi nindou amuri ranaheimbo kameihi amboani. Horombo ro yimbumbo sühi siheimbo ahini hoafi hoafiyahandürisi, nga hapondani amboani ro asükainda ahini hoafindahandüri samboanahi ro anguni ndarihe animboahi amboani. Ro asükaiya siheimbo sowana asihühi ana, nindou moaruwai hohoanimomoyei ranai mami ai-amboani tinjirifombü ratüपुरi ra ngiri gübüsüboadea-ndüri. ³Ranimboyu se randihi anihondumbo fifirindihimboyeyi Kraisi ai wandi yafambe süngufi haya hoafindümbui se fifirifembo masei. Nga wandi wari süngu Kraisi ai se-babidimbo nüngumbo siheimbo farihefendürimbo ana, ngiri ai mbosi-mbosindu. Nga asu aiana ahandi rani-poanimbo nginindi adükari ra siheimbo nafuiyundürühani. ⁴Yini, ra anihond-ane, horombo ai hamindi nginemindikoateyu ranimboyomo nindou nimi keimbi karihendeimbifihü tikorundümo pamarü-wura yifimayu. Nga asu hapondani

ana Godindi nginindi adükari hamindi ranambo botimarira asu ai yanggiri botifi anungu. Asu ro-amboani ai-dibo nimboefimboanefi hamindi kemindikoate-ayefi. Nga asu Godindi nginindi ranambo-animbo mare ro-amboani siheimbohündambo ai-babidi yanggiri nimboemboyefi.

⁵ Se siheihoari ro hoafi ranahambo anihondümbo-mbarihuyo asu wani-mbayefiyo mbisei hehi hohoanimondei hoeindihindi. Moani siheihoari yanggir-animbo hohoanimo ra randihi hohoanimondei hoeindihindi. Sisas Kraisi ai sihei hohoanimoambe anungu ra fifirihindai? Se ahambo fifirifikoate-ayei ana, awi se ahambo wudipoapofe anihondümbofe hohoanimo aho ra fifirifekoate-wamboanei. ⁶ Se hoafindeihiya, ai Kraisi anihondü ratüpuriyomo-rundeimb-anemo mbisei hohoanimondei sahehea ro anihondü fifirihamboanahi. ⁷ God ai siheimbo fariheirani asu se moaruwai hohoanimo süngufekoate moani aboedi yanggiri mbinimboeia sefi hohumboanefi ro ahambo siheimbo farihefe-ndürimbohünda didibafiyahundo arihundi. Se yihoefimboya, aiana Kraisi aboedi ratüpuriyomo-rundeimb-anemo nafuimbo yihoefi fimbo hoafiyefühi-yefipoani, nga wani. Nga bidifiri nindou yihoefimboya, “Ai Godindi ratüpurimbo moai aboedi ratüpuriyomo,” asei ana, ambesi, nga se aboedi hohoanimo ra süngumbirihahi heiya sefimboanefi didibafiyahu arihundi. ⁸ Roana nggiri hoafi hondü ranahambo giganambofembo moatükuni hohoanimo ana randihundi, nga hoafi hondü ranahambo yanggir-anehi hohoanimo parihu hefuhu rawarihu hefi. ⁹ Ro hamindi kemindikoate-yefani ana, asu se nginindi aboedi nimboeiani ro ranahambo hihifi-hihifi-yefühanefi. Asu ro siheimboya, hohoanimo moaruwai hininggirihi hehi didiboadorihahi hohoanimombeyeia sefi hohu Godimbo siheimbohünda didibafiyahundühanefi. ¹⁰ Ranimboanahi ro anguni ndanihü nimboambo siheimbo pas nda sürü papirihandühi hoafayahandüri. Asu rananimbo ro siheimbo-so tükündaheandühi amboani Adükari ai wambo nginindi masendiri rani hohoanimonambo siheimbo nginindi hoafimbo moei asahi. Nga nginindi ai wambo masendiri ra siheimbo moaruwaimbo-fendürimbohündamboyoani, nga siheimbo nginemindi-ndürimboane. Ranimboanahi ro siheimbo pas nda sürü papirihandüri.

Bidifiranambo hihifi hoafi

¹¹ Nga karisihandüri. Hohoanimo moaruwai hininggirihi hehi didiboadindihahi hohoanimondei. Ro hoafayahahi ranahambo himborindeihahi rani-süngundihindi. Mami hohoanimondeihahi aboedi sisi-koate nimboei. God nindou hipoamboreandühi aboediyu-randeimbi asu afurife hohoanimo sai-randeimbi ai se-babidi nüngumbui.

¹² Se Godindi nendi-yafe hohoanimo süngu wandafi-wandafindeihahi simbori wakikihürindei-ndühündi. ¹³ Godindi nendi munguambo ai-amboani siheimbo hihifarihündüri.

¹⁴Sihefi Adükari Sisas Krai ai siheimbo hipoambombireandür-
amboane asu God ai siheimbo ŋgusüfo pambireandür-amboane asu
Yifiafi Aboedi ai sihei ŋgusüfoambe mamambe-mbireandür-amboane.